

四庫全書

史部

欽定四庫全書

史部

唐會要卷一百九十七至

詳校官編修臣溫汝适

編修臣程嘉謨覆勘

總校官降調編修臣倉聖詠

校對官主事臣陳墉

謄錄監生臣葉中桂

欽定四庫全書

唐會要卷九十七

吐蕃

宋 王溥 撰

吐蕃者在長安西八千里本漢西羌之種也不知有國

之所由

或云南涼秃髮利鹿孤之子曰樊尼國滅之後西奔于羌中建國為衆所懷遂改姓為寧敦野

以秃髮為國號語訛謂之吐蕃歷魏及隋隔閭諸羌未通中國人號其王為贊普以

統理國事無文字刻木結繩為約徵兵為金箭冠至舉

燧與臣下一年一小盟

用羊狗
獬狴

三年一大盟

用人馬
牛驢以

麥熟為歲首其國都號為邏婆城用法嚴整議事則自下而起因人所利而行之此其所以強且久也重壯賤老母拜于子重兵死惡病終以累世戰沒者為甲門臨陣奔逃者懸孤尾於其首表其似孤之怯其贊普弄讚雄霸西域

貞觀八年九月朝貢使至十四年遣其相祿東贊致禮請婚姻獻金五千兩自餘寶數百事十五年以文成公

主妻之弄讚至栢海親迎于河源見王人執子壻之禮
甚恭而歎大國禮儀之美俯仰有媿沮之色及與公主
歸國謂所親曰我祖父未有通婚上國者今我得尚大
唐公主為幸實多當為公主築一城以誇示後代遂築
城立棟宇以居處之公主惡其赭面弄普遂下令禁之
身釋氍裘襲紵綺漸慕華風仍遣渠豪子弟請入國學
以習詩書又請中國識文字之人典其表疏上征遼還
獻大鷲黃金鑄成高七尺可受酒三斛高宗即位拜駙

馬都尉封西海郡王致書于長孫無忌云天子初即位
若臣下有不忠之心者當勒兵以助並獻金銀珠寶十
五種置太宗靈座之前高宗進封賓王因請蠶種及造
酒礮礮紙筆之匠並許之

永徽元年弄讚卒其子早卒立其孫年幼國事皆委祿
東贊祿東贊有謀畧初太宗許降文成公主東贊來迎
召見顧問進對合旨乃拜為右衛大將軍又以琅邪公
主孫女妻之東贊辭曰臣本國有婦父母所聘情不忍

車且贊普未謁公主陪臣安敢妄婚上嘉之東贊有子五人長悉若早卒次欽陵三贊婆四悉多于五勃論及東贊死欽陵兄弟復專其國

咸亨元年薛仁貴討吐蕃敗于大非川

上元二年李敬玄又敗于青海自是贊婆則專在東境欽陵主內政三十餘年恒為邊患

儀鳳三年上以李敬玄初敗吐蕃為患轉甚召侍臣曰吐蕃小醜屢犯邊境置之則疆場日駭圖之則未聞上

策宜論其得失各書所懷給事中劉景先曰攻之則兵
威不足鎮之則國力有餘且撫養士卒守禦邊境中書
舍人郭正一曰吐蕃作梗年歲已深興師不絕非無勞
費追討則徒損兵威深入則未窮巢穴臣望少發兵士
且遣備邊明立烽候勿令侵掠待國用豐足一舉而滅
之給事中皇甫文亮曰且令大將鎮撫畜養將士仍命
良吏營田以收糧儲必待足兵足食方可以舉而取之
上曰宿將舊人多從物故自非投戈俊傑安能克滅凶

渠中書舍人劉禕之曰臣觀自古聖主明君皆有邊戎
為梗今吐蕃憑陵未足為耻願養萬乘之威寬百姓之
役給事中楊思忠曰聖人御物貴在從時今凶寇不能
懷德未肯畏威和好之謀臣謂非使中書侍郎薛元超
曰臣以為敵不可縱縱敵則患生邊不可守守邊則卒
老不如料簡士卒一舉滅之上願謂黃門侍郎來恒李
勣已後實無好將當今以張虔勗紀及等差為優耳恒
曰昨者洮河兵馬足堪制敵但為諸將失於部分遂無

成功今無好將誠如聖旨

聖歷二年贊普器弩悉弄年長乃與大臣論巖密圖欽陵名其親黨二千餘人殺之欽陵自殺

景龍四年來請婚以左衛大將軍楊矩為送金城公主使後矩為鄯州都督吐蕃厚賂之因請河西九曲之地以為公主湯沐之邑矩遂奏與之吐蕃既得九曲其地肥良又與唐境接近自後復叛楊矩懼飲藥而死

先天元年十月二十六日吐蕃遣使來朝吐蕃自漢界

出鄯城五百里過島海入吐部落彌多彌蘇昆及白蘭等
國風雨雷電隔日有之夏氣如中國暮春之月山有積
雪地有冷瘴令人氣急不甚為害其俗重漢繒而貴瑟
瑟男女用為首飾其君長或居拔布州或居邏婆州有
小城而不居坐大羶帳張大拂廬其大可容數百人兵
衛極嚴而衙府甚狹俗養牛羊取乳酪供食兼取毛為
褐而衣焉不食驢馬肉以麥為麪人死殺牛馬以殉取
牛馬頭周壘於墓上正方壘石為之狀若平頭屋焉其

臣與君自為友號曰共命人其數不過五人君死之日共命人皆日夜縱酒葬日于脚下刺血出盡及死便以殯葬又有親信人用力當腦縫鋸亦有將四尺木大如指刺兩肋下死者十有四五亦殉葬焉設官父死子代絕嗣則近親襲焉非其種類輒不相代其官章飾有五等一謂瑟瑟二謂金三謂金飾銀上四謂銀五謂熟銅各以方圓三寸褐上裝之安膊前以辨貴賤其戰必下馬列行而陣死則遞收之終不肯退槍細而長于漢者

弓矢弱而甲堅人皆用劍不戰亦負劍而行其驛以鐵
箭為契其箭長七寸若急驛膊前加一銀鶻有草名速
古芒葉二寸狀若斜蒿有鼠尾長于常鼠其國禁殺鼠
殺之者加其罪有可跋海去赤嶺百里方圓七里東南
流入蠻與西洱河合流而東號為撲鼻水又南出會川
為瀘水焉自赤嶺至邏婆川絕無樹木惟有楊柳人以
為貴

開元二年五月吐蕃宰相坐達延陀獻書于宰相曰兩

國地界事資早定界定之後然後立盟其月吐蕃使其
宰相尚欽藏及御史名悉獵來獻盟書玄宗御承天門
樓命有司引見置酒于內殿宴遣之其月至達延陀率
衆侵我渭源帝下制親征會薛訥遇賊數萬衆戰于武
階驛大破之乃罷自五年至十年凡八來朝并貢方物
二十一年二月金城公主上言請以今年九月一日樹
碑于赤嶺定蕃漢兩界時李嵩使于蕃金城度其還期
在暮秋故有是請及樹之日詔張守珪李行禕與其使

莽布支同訖其事是月遣其大臣屬盧論莽藏來朝及獻方物自二十二年每歲遣使賀正并貢獻至二十年七月金城公主薨

神龍元年其贊普器弩悉弄卒其子棄肆跼贊嗣位贊時年七歲使來告喪中宗為之舉哀廢朝一日俄而棄肆祖母遣使獻金二千兩為棄肆求婚中宗遂養公主為女降嫁之自是頻歲貢獻然亦時犯西邊十三年遣使來賀不許

十七年復遣使來朝詔王忠及皇甫惟明及內侍張元方使于吐蕃惟明既見贊普及公主皆欣然請和盡出貞觀以來勅書以示惟明又遣其重臣名悉獵隨惟明入朝贊普既獻寶公主又獻金鴨盤等物名悉獵知書先是迎公主長安當時朝廷皆稱有才辨及引入賜宴與語甚禮之詔御史大夫崔琳充使宣諭于赤嶺各樹分界之碑約不相侵至是公主薨遣使告哀仍請和不許使到數月始命有司為公主于光順門發哀輟朝三

日天寶中連事西討進收黃河九曲拔其石堡城

至德二年三月復遣使請和且助國討逆詔遣南巨川
報之明年二月又遣使來朝復請盟詔從之

大歷元年至十年凡七來朝貢十三年正月遣將馬重
英率衆四萬侵靈州奪我水口填漢渠御史渠以弊屯
田

建中元年正月入蕃使太常少卿韋倫至自大歷已後
吐蕃陷我河隴諸州勅使前後數輩皆留之不遣邊上

每傳獲其人亦令中官部紀徙之江嶺德宗初即位務以德綏遠方徵其俘囚五百人給衣一襲使韋倫給還其國與之約和仍勅邊將無得侵伐吐蕃使歸其人不之信及蕃俘入境部落皆畏威懷惠焉又命倫為太常卿復使蕃中其年十二月倫至自蕃中與其宰相論欽明思等五十五人皆至獻其方物吐蕃見倫再至甚歡既館聲樂以娛之留九日而旋兼遣其渠帥報命倫一歲再往絕域戎夷奉敬無此之速也

二年三月以萬年縣令崔漢衡為殿中少監持節使西戎初吐蕃遣使求沙門之善講者至是遣僧良琇文素二人行每人歲一更之其年十二月入蕃使判官監察御史常魯與吐蕃使論悉羅等至自蕃中奏請改勅書以貢獻為進以賜為賞以領取為領之優詔降諭曰前相楊炎不修故事致此誤耳並從之

三年九月崔漢衡與蕃使區頰贊至自吐蕃乃約靈州以賀蘭湮州以彈箏峽西口隴州以清水為漢界皆建

碑以誌之遂以是年十月十五日相與同盟于境上其
年十月以都督員外郎樊澤兼御史中丞充吐蕃計會
使約以來年正月十日會盟于清水

四年正月詔隴右節度使張鎰與吐蕃使尚結贊盟于
清水會盟官崔漢衡等七人與結贊及宰相等七人俱
昇壇為盟夏四月吐蕃將士僧尼等至自沙州凡八百
人報元年之德

貞元元年九月遣左監門衛將軍康成使于蕃中且定

界是月鳳翔節度使李晟遣兵襲吐蕃衆於堆沙堡大破之焚其儲積斬渠長扈屈律悉等七人傳首京師結贊等聞而大懼累遣使請和仍用永盟皆不許會馬燧自河東至且保明其誠至乃許之

二年九月吐蕃遊騎及于好時京師戒嚴遂遣左金吾衛將軍張獻甫等統兵屯于咸陽其月二萬餘衆又寇鳳翔城下李晟出兵禦之一夕而退其年十一月吐蕃陷我鹽州初賊之來寇也刺史杜彥光使以牛酒犒之吐

蕃謂曰我欲州城以居之聽爾率其人而去彥光乃率衆歸麟州其年十一月吐蕃陷夏州亦令刺史拓跋乾曜率衆而復據其城自是又寇銀州銀州素無城壁居者奔散蕃亦棄之

三年二月以前太子右諭德崔澣為檢校左庶子兼御史中丞充入蕃使四月至自鳴沙不數日澣復以鴻臚卿兼中丞又充入蕃使令澣報蕃宰相尚結贊曰杜希全職在靈州不可出境李觀又已改官遣侍中渾瑊充

盟會使約以五月二十四日復盟于清水又令告尚結
贊以鹽夏二州歸于我然後就盟會其年夏吐蕃刼盟
于平涼川

八年山南西道節度使嚴農奏擊破吐蕃于芳州及黑
水堡焚其積聚并獻首獲九年劍南西川節度使韋皋
攻吐蕃之維州獲大將軍論贊熱以獻

十年五月劍南西川節度使韋皋又奏西山峨和城擊
破吐蕃二萬餘衆攻拔城柵斬首三千八百餘級獲其

器械牛馬其年八月先沒蕃中使李朝清歸自吐蕃

十三年正月贊普遣使農桑普貴表請和好帝以其豺
狼之性數負恩約不受表狀放其使歸蕃七月韋臯奏
去年二月十七日吐蕃于劍山馬嶺三路分軍下營僅
往一月進軍逼臺登城雋州刺史曹高任率諸將軍士
并東蠻子弟合勢接戰自朝及午大破之生擒大龍官
七人陣上殺獲甚衆

十七年七月吐蕃陷我麟州殺刺史郭鋒毀城隍大掠

居人驅党項部落而去次鹽州西九十里橫槽峰頓軍
有番卒傳呼州僧延素輩七人稱徐舍人召其大陣沒
勒支處引延素等疾超至帳前皆馬革桔手麻繩縲頸
見一吐蕃年少身長六尺餘朱髮大目乃徐舍人也命
解縛坐帳中曰師勿懼予本漢人司空英公五代孫也
屬武后斷喪王室余高祖建義中泯子孫流播絕域今
三代矣雖代居戎職位掌兵要思本之心無涯顧血族
無由自拔耳此番漢交境也復九十里至安樂州師無

由東矣延素曰僧身孤親老敢祈全活悲不自勝又曰
余奉命率師備邊因求資食遂涉漢疆展轉東進至麟
州城下城既無備援兵又絕是以拔之知郭使君是勲
臣子孫必將活之不虞為亂兵所害適有飛鳥使至飛
鳥猶中國驛騎也云使者上變召軍亟還遂解縛歸之
時詔命韋臯分遣偏將勒步騎合二萬出都城西山南
北九道並進逼樓離老翁故維州保州松州諸城以紓
北邊故也其年九月韋臯又奏大破吐蕃于雅州

十八年正月韋臯又破吐蕃生擒大首領論莽熱來獻
至二十年二月吐蕃請和使其臣論乞再等五十四人
來朝貢至二十一年三月以吐蕃贊普卒廢朝三日命
工部侍郎兼御史大夫張薦予祭之七月贊普使論乞
數勃藏奉獻德宗皇帝山陵金銀衣服牛馬等陳于太
極殿庭

元和元年七月遣使論勃藏等來朝并獻方物

二年春吐蕃人歸日西蕃并遣使論思那熱來朝并歸

鄭叔矩路泌之樞及叔矩男武延等一十三人叔矩貞元初平涼背盟所陷凡二十餘年竟不屈節

五年五月命宰臣杜佑等與吐蕃使議事于中書令廳且言歸我秦原安樂州地自六年至十年遣使朝見并獻方物相繼不絕

十一年西川奏吐蕃贊普卒

十二年吐蕃告哀使論乞髯獻馬十匹玉帶金器等

十三年宴吐蕃使于中書八月吐蕃使論司熱等七人

解于宣政衙已事不退且徵國使詔有司諭之方出勅
令後入迴鶻吐蕃南詔使所奏隨從不得過三十人新
羅使不得過二十人迴鶻吐蕃使下合授正官不得過
十人南詔不得過五人其年十月吐蕃圍我賓州命夏
州兵擊退之

十四年三月詔蕃使論矩立歲等并後般來使並宜放
歸本國八月寇我鹽州及慶州方渠下營大軍至河州
界其年復遣矩立歲來朝貢立歲自稱請和好詔納其

請遣還其年十月以太子中允張賈為太府少卿攝御
史中丞持節充入蕃答請和好使尋貶賈為撫州司馬
責其逗留不行也以卻同代之至其年十二月靈武奏
吐蕃大軍營于黃河北煙塵數十里鳳翔進吐蕃表函
一封西川奏吐蕃入雅州界時方鎮鄰接蕃界者皆奉
詔備禦東川節度使王涯上言臣道當出軍徑入賊腹
有兩路一路從龍州青州鎮入吐蕃界直抵故松州城
是吐蕃舊置節度之所一路從綿州威蕃柵入蕃界直

抵栖雞城是吐蕃險要之地涯又陳備禦吐蕃要畧曰
臣伏願陛下不愛金帛之費以釣北蕃之心遣信臣與
之定約曰西戎為邊患者數矣能制而伏者惟有北蕃
如能發而深入殺若干人取若干地則投若干之賞開
懷以示之厚利以啗之一戰之後西戎亦衰矣

長慶元年四月遣尚綺力陀思來朝并獻國信其月吐
蕃使郭居簡朝貢兼遺宰臣馬又遣使論約藏來請盟
其年八月吐蕃請盟許之宰相欲重其事請告太廟太

常禮院奏謹按肅宗代宗故事與吐蕃會盟並不告廟
惟德宗建中末會盟于延門欲重其誠信時令告廟至
貞元三年會于平涼亦無告廟之文伏以事出一時又
非經制策之典故亦無其文今叅詳不合告從之十月
命宰相崔植等十四人與吐蕃使論納歲盟於郡城西
王會寺十一月又遣使論答熱等來朝

二年五月又遣使論贊等來朝并進馬六十匹羊二百
口及銀器玉帶等七月入蕃會盟使劉元鼎奏以五月

六日與吐蕃盟于悶惶盧川是川蓋普之夏衙也中有
臧河流焉滿川多紫薇樹其月吐蕃使論悉諾息等隨
元鼎來謝十月命太僕少卿兼御史中丞杜載持節充
答吐蕃謝會盟使

三年正月遣使論答熱來賀正并表進羊六百口

四年遣使來求五臺山圖

寶曆元年三月遣尚綺立熱來朝且請和好

二年十一月詔遣光祿卿兼御史大夫李銑持節入蕃

充答和好使

太和五年正月遣使論乞熱來朝

六年又遣使論董勃歲來朝

九年正月遣使論龍熱來朝

開成元年遣使論悉立熱來朝正并獻國信及馬

二年遣使論監通等來朝先是遣宗正少卿兼御史中

丞李從簡入蕃其年五月蕃中遣使進國信金銀器玉

帶獺褐犂牛尾朝霞氍毹雜樂并馬牛橐駝等詔以其信

物頒賜宰臣已下

四年遣使論焦熱等來朝

會昌二年贊普卒至十二月遣論贊等來告喪詔廢朝
三日仍令文武常叅官四品已上就鴻臚寺弔其使者
詔遣將作少監兼御史中丞李璟持節入西蕃充弔祭
使

三年正月璟至自吐蕃

大中三年春吐蕃宰相尚恐熱因東道節度使以秦原

安樂等三州并石門木峽等七關款塞涇原節度使康
季榮以狀聞上命太僕卿陸耽往勞焉其年七月河隴
耆老率長幼千餘人赴闕下上御延喜殿觀之莫不歡
呼抃舞更相踴躍就冠帶於康衢然後命善地以處之
觀者咸稱萬歲八月勅曰古帝王之有國也何嘗不文
以守成武以集事叅諸二柄歸乎太寧朕猥荷丕圖思
弘景業憂勤戒惕四載于茲每念河湟土疆綿亘遐濶
天寶末西戎乘我多難無力禦奸遂縱侵略不遠京邑

事更十葉時近百年進士試能靡不竭其長策朝廷下
議亦皆聽其直詞盡以不生邊事為永圖且守舊地為
明理往苒于是收復無由今者天地儲祥祖宗垂佑遠
人輸款邊壘連降創業建功所謀必尅實賴樞衡妙筭
將帥雄俊副玄元不爭之文絕漢武遠征之悔甌脫頓
空于內地斥堠全據于新封莫大之休指期而就況將
士等櫛風沐雨暴露郊原披荆榛而刁斗夜嚴逐豺狼
而窮廬曉破動皆如意古無與京念此職勲宜加寵賞

涇原宜賜絹六萬疋並以戶部產物充賞仍待康季榮收明等各領征師到本鎮度支差脚兩司各差人押領送至本道分付令充節級優賞四道牧州牧闕有功勞軍將各宜具名銜聞奏當議甄獎原州秦州威州并七關側近訪聞土地肥沃水草豐美如有百姓要墾闢耕種五年不加賦稅五年已後量定戶籍使任為產業涇地有鹽頗聞厚利如置權稅可贍邊陲仍委度支計會制置聞奏四道長吏如能各于鎮守處遣官健營田度

支出牛糧種子每年量得多少充軍糧亦不限約定數
原州秦州威州并七關鎮守官健每人各給衣料兩分
一分依常年例支給一分分度支加給仍二年一度替
換其家口委長吏切加安存官健有庄田戶籍者仰州
縣放免雜差役秦州至隴州已來道路要置堡柵與秦
州應接李玘與劉臯即便計度聞奏商賈往來興販貨
物任擇利便一切聽從關鎮不得邀詰其官健父兄子
弟要往通傳家信不限多少任去如要墾闢種田依百

姓例處分三州七關如要器仗長吏與量據所要申奏
除授刺史關使後三五月內差人巡檢有如修築部署
課績殊尤并訓練有度者其刺史關使雖新授官爵亦
更與超升其官健節給更予優賞山南西道劍南西川
邏界沒蕃州縣量力復其兵士委本道差遣如要錢物
接借亦具聞奏三州七關創置戍卒且要務靜如有羌
戎潛來貿易輒不得容受委刺史關吏切加禁斷或有
投降吐蕃到邏上收取本道令長吏奏取進止其京城

有犯事合流役囚徒從今已後一切配在十處收管嗚呼七關要害三郡膏腴候館之殘址可尋唐人之遺風尚在邈懷往事良用興嗟夫取不在廣貴保其金湯得必有時詎計于遲速今則便務修築不進干戈必使足食足兵有備無患載洽亭育之道永致生靈之安遠邇臣僚宜體朕意

咸通七年十月沙州節度使張義潮奏聞迴鶻首領僕固俊與吐蕃大將尚恐熱交戰大敗蕃寇斬尚恐熱傳

首京師

唐會要卷九十七

欽定四庫全書

唐會要卷九十八

宋 王溥 撰

迴紇

迴紇在薛延陀北境居近娑陵水去京師六千九百里
勝兵五萬口十萬先屬於突厥初有特健俟斤死有子
曰菩薩部落以為賢而立之由是大振菩薩勁勇有膽
氣善籌策常以少制衆其母烏羅渾主知諍訟之事平

決嚴明其地沙鹵有大羊而足長五寸貞觀二十一年正月率衆內附

顯慶三年十二月以迴紇故燭龍州刺史吐迷度子娑闐授右衛大將軍

龍朔三年二月移燕然都護府于迴紇都落仍改名瀚海都護府其瀚海都護府移雲中古城改名雲中都護府仍以磧為界磧以北者為蕃州悉隸瀚海磧南並隸雲中娑闐卒妹比栗毒代立比栗毒卒子獨解支立其

都督親屬及部落征戰有功者並自磧北移居甘州界
故天寶末取驍壯以充赤水軍騎士在磧北者自則天
後並為默啜所役屬仍別立都督以統之獨解支卒子
伏帝匐立為河西經畧副使兼赤水軍使

開元七年伏帝匐卒贈特進遣使弔祭子承宗立承宗為
涼州都督王君奐誣奏長流瀼州而死其部落猶存

天寶初迴紇葉護逸標必襲滅突厥小殺之孫烏蘇木
施可汗未幾自立為九姓可汗由是至今兼九姓之號因

而南徙居突厥舊地依烏德健山嘔昆河居焉雖行逐水草大抵以北山比中國之長安城直南去西城一千

七百里

西城即漢之高閼塞

北去磧口三百里有十一都督九姓

部落一部落置一都督于本族中選有人望者為之破
拔悉密及葛邏祿皆收一部落各置都督一人每行止
戰闕以二客部落為鋒其九姓一曰迴紇二曰僕固三
曰渾四曰拔曳固

即拔野古

五曰同羅六曰思結七曰契苾

以上七姓部自國初以來著在史傳八曰阿布思九曰

骨崙屋骨恐此二姓天寶後始與七姓齊列天寶三載三月朝廷以逸標必有誅烏蘇木施功封為奉義王及破拔悉蜜自稱骨咄祿昆伽闕可汗又遣使朝貢四載加授特進五載冊為懷仁可汗六年逸標必卒子磨延啜立國人號為葛勒可汗磨延啜勇悍善用兵十五載迴紇吐蕃各使請和親助國討逆葛勒可汗棄于葉護以精騎三千隨朔方節度使郭子儀討賊

至德元載七月肅宗即位于靈武二載五月朔駕在彭

原四月官軍為賊將安守忠所敗于清渠北乃遣中官
竇議使於迴紇令發其兵九月迴紇遂遣太子葉護領
蕃兵四千餘人來助討賊葉護入見肅宗親宣慰賜以
金帛廣平王豫領朔方安西迴紇南蠻大食之衆十五
萬討安慶緒既戰大敗逆賊遂收東京十一月迴紇至
東京勅百官于長樂驛迎上御宣政殿引葉護宣慰其
餘豪長列于階下賜錦繡繒綵銀品物甚多葉護辭歸
帝謂曰能為國家就大事者卿力也何遽去耶葉護奏

曰迴紇戰兵留在沙苑欲更為陛下收范陽馬少不足以討除餘孽請且歸靈夏已北取馬用濟其事優詔答之仍許和親

乾元元年六月遣達亥阿波刺史來迎公主拜開府儀同三司並獻馬五百匹貂裘白氍等又遣宰相諦德領驍將三十人助國討賊七月冊命葛勒可汗為英武威昆伽可汗封幼女為寧國公主以降焉八月遣三子骨啜特勒九月遣大首領蓋將軍等謝主下降又賜三婦

人來朝二年四月威武毘伽可汗卒長子葉護先被害
小子移地建立是為登里可汗

寶應元年四月迴紇演者裴羅等十八人來朝八月可
汗自將精騎五千南踰太原晉絳屯兵于陝州平陸縣
遣使奏請助王師討平殘寇是日引其使宴于延英殿
賜物有差命左散騎常侍兼御史大夫尚衡使于迴紇
軍宣慰可汗遣弟右殺領精騎三千以行營節度使僕
固懷恩破逆賊史朝義于北邙山二年正月可汗辭還

蕃六月冊命為頡咄登密于合俱錄英義建功毘伽可汗

大曆十三年六月河中府朔方將士劫迴紇使輜重因大掠河中坊土迴紇格戰死者數千人十月迴紇寇太原河東節度留後鮑防出師與迴紇戰于曲陽我師敗績死萬餘人十四年英義建功可汗為其下所殺

建中元年六月冊迴紇合骨咄祿毘伽可汗為武義成功可汗命京兆尹源休持節冊立初德宗遣中官梁文

秀告哀于迴紇且修舊好可汗移地健不為禮而九姓部落屬于迴紇者又陳中國便利以誘其心其相頓莫賀達于諫不聽思人怒擊殺之并殺其親信及九姓之所誘來者凡三十人頓莫有立號為合骨咄祿毘伽可汗使其豪長聿達于隨文秀來朝故命休冊拜焉

二年六月以兼光祿卿李涵為散騎常侍充弔冊迴紇使

貞元三年八月迴紇使合闕將軍歸蕃初合闕將使命

請婚于我許以咸安公主嫁之命公主見合闕于麟德
殿直令中謁者賁公主畫圖賜其可汗四年十一月迴
紇公主及使至自本藩德宗御延喜門以觀之可汗喜
于和親其禮甚恭乃喜言曰子壻半子也父患西戎我
子也當遣兵除之又罵辱吐蕃使乃使其宰相等率衆
千餘人及妹吐骨祿昆伽公主姨迷叔咄祿公主及職
使大首領等妻妾凡五十六婦人來迎可敦聘馬三千
匹勅令朔州及太原分留迴紇七百餘人其宰相大首

領等至者館于鴻臚寺召迴紇公主及使者對于麟德殿頒賜有差詔以咸安公主出降迴紇可汗仍特置府官屬並同親王府十一月冊令骨咄祿武義成功可汗為天親可汗

五年七月公主至衙帳迴紇使李義進請因咸安公主下降改紇字為鶻字蓋欲夸國俗俊健如鶻也德宗允其奏自是改為迴鶻其年九月天親可汗卒子多邏斯立國人謂之判官特勒詔冊為登里邏沒密施俱祿忠

貞昆伽可汗以鴻臚卿兼御史中丞郭鋒為弔冊迴鶻
使至六年四月忠貞可汗卒子阿噉立十月郭鋒至自
迴鶻初鋒奉使冊忠貞可汗是歲忠貞為弟所殺而篡
立時迴紇大將頡利迦斯西擊吐蕃未迴及四月其次
相率國人殺篡者而立忠貞之子為可汗方年十六七
及六月頡子迦斯西討回將至牙帳次相等懼其復有
廢立不欲漢使知之留鋒數月迴及頡子迦斯之至也
可汗等迎于郊野盛陳鋒所送國信器幣可汗與次相

等皆俯伏自言廢立之由且請命曰今日惟大相生死之悲以所陳毳幣贈頡子迦斯以悅之可汗又拜泣曰兒愚幼無知今幸得立惟仰食阿爹國政悲不敢聞也迴鶻謂父曰阿爹七年二月詔冊阿噉為奉誠可汗遣鴻臚少卿御史大夫庾挺持節弔祭冊命之四月迴鶻遣使聿支達于等來朝且告小寧國之喪小寧國崇王琬之女寧國將有行肅宗念其遠去故遣媵之及歸寧遂留之故國人號為小寧國公主也九月敗吐蕃于北庭使來獻捷

十一年十一月奉誠可汗卒奉誠無子國人立其相骨
咄祿將軍詔冊命為滕里邏朮祿沒密施合和祿多利
邪昆伽懷信可汗五月令秘書少監兼御史中丞史館
修撰張薦持節弔祭冊立之其骨咄祿將軍本姓跌跌
少孤為迴鶻大首領所養及長有武藝辯慧自天親可
汗時已掌兵馬衙官諸大首領多敬服之奉誠無嗣國
因奉為王其天親以上諸可汗有子見幼小者並送闕
庭至德後迴鶻于中原有功故懷信可汗不敢言奉誠

從人望也

永貞元年懷信可汗卒遣使來告喪十一月冊命可汗

為愛登里邏洎德密施俱錄毘伽可汗

未詳愛登里邏與懷信何親史

並不載

以鴻臚少卿兼御史中丞孫景持節充弔祭冊立

使至元和元年二月凡三朝貢三年二月迴鶻使來告

咸安大長公主之喪廢朝三日公主德宗第八女也本

降天親可汗卒子忠正可汗立忠正可汗卒子奉誠可

汗立奉誠可汗卒國人立其相是為懷信可汗皆從其

國俗尚公主在蕃凡二十一年卒冊贈燕國大長公主
諡曰襄穆三月御麟德殿對迴鶻使多覽將軍等賜白
綵錦衣服銀器有差自迴鶻請修蕃臣之禮五年後常
遣使朝貢六年迴鶻可汗卒遣使掘野居葛勒將軍來
告喪七年正月冊命可汗為軍登里邏骨德密施合昆
伽可汗命檢校工部尚書鴻臚卿兼御史大夫張茂宣
持節弔祭冊立之八年四月迴鶻使和親伊珠難還蕃
宴于三殿贈銀器繒帛九年僕固昌來朝十一年正月御

麟德殿引對迴鶻使賜錦綵銀器有差三月又遣使押
進橐駝九頭馬八十匹十一年迴鶻可汗卒遣使來告
喪十一月冊迴鶻可汗為愛登里邈骨沒密施合昆保
義可汗命宗中正少卿兼御史中丞李孝誠持節弔祭
冊立之十五年三月御麟德殿引見迴鶻使合達子等
許其尚主其月封第九妹為永安長公主降嫁迴鶻可
汗

長慶元年三月保義可汗卒輟朝三日四月冊迴鶻可

汗為君登里邏羽祿密施勾主祿昆伽可汗五月所遣
迴鶻宰相都督公主麾尼等至迎所降公主也初保義
可汗求婚許降以永安公主保義既卒則宜改定而使
人固請永安尋以第五妹封太和公主出降迴鶻命中
書舍人王起就鴻臚寺宣諭馬上御麟德殿對迴鶻使
及公主五十人等賜錦繒銀器有差六月勅太和公主
宜特置府命宰相杜元穎充五禮使迴鶻宰相并公主
獻駝褐白錦白練貂鼠裘鴨頭子玉腰帶等馬一千匹

駝五十頭口七月冊太和公主為仁孝端麗明智上壽
可敕命左金吾衛大將軍兼御史大夫何証為送公主
及冊可汗使光祿卿兼御史大夫李憲為之副三年回
鶻可汗卒其從父弟曷薩可汗立遣使來告喪冊曷薩
可汗為君登里汨羅沒密施合昆伽可汗命工部尚書
兼御史大夫鄭權弔祭冊立之寶厯中頻使朝貢至太
和六年為其下所殺其從子和特勒立遣使告喪為之
廢朝詔冊和特勒為君登里邏汨沒密施合昆伽可汗

命左驍衛將軍兼御史大夫唐弘實持節弔祭冊立之
開成四年其相勿薦公引山北沙陀攻圍之可汗自殺國
人立勿薦公為署颺可汗未受冊命連年饑疫羊馬死
者被地又大雪為災武宗即位遣時澤王溶告喪始知
易代其年為黠戛斯所害其國分散有烏希特勒者曷
薩之弟和特勒之叔也亦率衆南奔至錯子山乃自立
為可汗居塞上朝廷遣鴻臚賈耽右將軍王會往宣諭
分邊餼以振食之兼就大同川還其馬價絹直冊為可

汗遣將作少監兼御史中丞苗鎮持節駐于河東待其底定然後受而可汗違背恩德侵劫諸部落旋又擅入雲州將入振武上以為天亡數盡不可容也乃命河東等道兵討之

會昌三年正月諸軍大破迴鶻於薩呼山就其帳中奉太和公主歸於我軍其特勒以下大衆數萬人盡降獲其前後所賜勅書可汗亦被瘡與百騎踰山遁走捷書至宰相率百僚闕中稱賀先是迴鶻宰相唱沒斯特勒

將其家屬及麾下數千人來降上嘉之降書撫宥仍賜姓李氏封懷化郡王改名思忠賜中第于永樂坊并家屬遣所在給傳赴闕其軍士分于諸鎮收管用壯騎兵

西爨

西爨者南寧之渠帥自云本河東安邑人七代祖事晉人為南寧州太守屬中國亂遂王其地梁元帝時南寧州刺史徐文威徵詣荊州有爨瓚者遂據南寧之地延袤二千餘里既死其子震玩統其衆高祖受禪拜翫子

弘達昆州刺史令持其父喪歸葬于祖塋既又遣俞大施至南寧諭之部落歸款武德七年七月二十四日來貢方物

昆彌國

昆彌國者一曰昆明西南夷也在爨之西洱河為界即葉榆河也其俗與突厥畧同去京師九千里勝兵數萬人相傳云與匈奴本是兄弟國也漢武帝得其地入益州郡而其後復絕諸葛亮定南中亦所不至

武德四年嵩州治中吉弘偉使南寧因至其國諭之至十二月遣使朝貢因求內附自是每歲不絕其使多由黔南路而至近又封其別帥為滇王代襲其國

貞觀十九年四月二十日右武衛將軍梁建方討之降其諸屯七十二所戶十萬九千三百遣使往洱河有數十百部落大者五六百戶小者二三百戶無大君長有數十姓以楊李趙董為名家各擅一州不相統攝自云其先本漢人有城郭村邑自夜郎滇池以西皆云莊蹻

之餘種也其土五穀與中夏同以十二月為歲首

林邑國

漢日南象郡之地其先因漢女子徵側之亂是後功曹
子區連殺縣令自號為王無子其甥熊代立晉宋已來
恒通中國其地恒溫不識冰雪常多霧雨人能用弩以
藤為甲王出則列象千頭信佛法以二月為歲首稻歲
再熟有結連鳥能解人語

亦謂之結了鳥
蓋土音訛也

武德六年二月其王梵志遣使朝貢

貞元四年又貢大珠大如雞卵圓白皎潔狀若水晶正
午向日以父承之即火燃八年又獻白鸚鵡情識辨慧
善于應答太宗憫之並付其使令放歸林藪十四年其
國獻通天犀一十枚諸寶稱是永徽總章中有玉鉢迦
含波摩累獻馴象先天開元中其王建多達摩又獻馴
象沈香琥珀等

天寶八載其王盧陀羅使獻真珠一百顆沈香三十觔
鮮白氎二十隻自至德後遂改稱環王國不以林邑為

號貞元九年環王因遣使貢犀牛上令見于太廟

元和四年八月安南都護張舟奏破環王國偽驩愛州
都統殺三萬餘人獲其王子五十九人器械戰船戰象
稱之

咸通二年十二月攻安南府遣神策將軍康承訓率禁
軍并江西湖南之兵赴援先是大中末安南都護李琢貪暴侵刻獠民羣僚引蠻攻

安南至咸通三年大徵兵赴援天下騷動其年東蠻境陷交趾

真臘國

在林邑之西南本扶南之屬國也東接車渠西屬驃南
濱海王姓劉利氏其俗東向開門國以東為上有戰象
五千頭梁大同中始并扶南而有其國都伊奢那城風
俗與林邑同

武德六年十月遣使來朝

貞觀二年十一月又與林邑國俱來朝貢太宗嘉之賜
賚甚厚今南方人謂真臘國為善國自神龍已後真臘
分為二半以南近海多陂澤處今謂之水真臘半以北

多山阜處今謂之陸真臘亦謂之文單國貞觀中累遣使朝貢永徽二年遣使獻馴象

聖歷元年開元五年天寶九載並遣使朝貢并獻犀牛水真臘國者其境東西南北約皆八百里東至奔陀浪洲西至墮羅鉢底國南至小海北至陸真臘國其王所處城號娑羅城提拔國之東有小城皆謂之國其國甚多象餘所出物產及言語與真臘同

元和八年遣使李摩那等來朝

白狗羌

西羌之別名與會州連接勝兵一千白蘭羌亦西羌之別種風俗並與党項國同

武德六年十二月遣使朝貢

貞觀五年十二月其渠帥並來朝

永徽二年十一月特浪生羌卜樓莫各率衆萬餘戶詣茂州歸附其年正月生羌大首領凍就率部落內附以其地置建州顯慶中白蘭為吐蕃所併收其兵以為軍

鋒

開元二十九年春益州刺史仇兼瓊奏其國及索摩等諸州龍官三百餘來至秦州望准女國等例簡擇許令入奏餘並就秦州宴賞放還從之其年十月白狗國四品龍官蘇唐封及狗子川五品龍官薛阿封管至各賜紫金及帛以遣之

貞元九年七月其王羅陀葱又與女國等詣劍南西川節度使韋臯內附謁授試太常卿兼保州司馬至今子

孫承襲其爵

曹國

理那蜜水古康居之地俗與康國同附于突厥勝兵千餘人好淫祠罄資產而無悔去瓜州六千里

武德七年七月朝貢使至云本國以臣為健兒聞秦王為神武願在麾下高祖大悅

貞觀十一年至開元中朝貢不闕

天寶元年其王哥邏僕使獻方物三年詔封其主為懷

德王四載哥邏僕羅上表自陳曾祖以來回天可汗忠
赤常受徵發望乞恩慈將臣土國同于唐國小子所須
驅遣臣身一心為國征討十一載其王設阿忽與國副
王野解及九國王並上表請同心擊黑衣大食玄宗晏
賜懃諭遣之又有中曹國在西曹國之東康國之北其
所治謂之迦布底真城在平川其人長大工于戰又有
西曹國理那蜜水南愁底痕城東南去康國一百里西
北至河國二百里南與史國界接北與波覽國界接其

城東北四十里有越于底城內有得悉神遠近敬信之
有金叉金破羅濶一丈五尺每日所祭羊馬千人食之
不盡并有金銀器其上題云漢天子所賜神器隋大業
中始通武德以後常修蕃禮

殊柰國

崑崙人也在林邑南去交趾海行三月餘日習俗文字
與婆羅門同絕遠未常朝中國貞觀二年十月使至朝
貢

拔野古國

在僕骨東境勝兵一萬戶六萬人皆殷富其地東北一
千里曰康干河有松木入水一二年而化為石其色青
有國人居住其人謂之康干石人皆著木脚上山逐鹿
其國東北六日行至鞠國有樹無草無羊馬有鹿如中
國牛馬使鹿牽車可勝三四人衣鹿皮鹿食地苔自鞠
國東行十五日並俞折國土地廣大百姓多風俗與拔
野古同地少牛馬而多豹羆鞠國北有大漠國饒羊馬

其人極長大長者至丈三四其國云北有骨帥國與大漠國相接戶萬五千勝兵三萬

霄國

匈奴之別種亦與靺鞨為隣勝兵萬人並臣于頡利習俗與突厥畧同其渠帥號為俟斤

貞觀三年朝貢至二十一年列其地為寶顏州即以其渠長為刺史先是太宗蕩平突厥其豪帥多授以侍衛之官沙漠之人素愛錦罽太宗既招來遐域特賜其好

者因錦文所用舊縷而錯綜其色花葉翔走事多殊形
每頒賜其渠長大為榮寵

顯慶五年以其首領李含珠為居延都督含珠死以其
弟厥都為居延都督自後無聞焉

党項羌

在古析支之地漢西羌之別種魏晉已降西羌微弱周
滅宕昌鄧至之後党項始强南雜春桑迷桑等羌北連
吐谷渾其種每姓別自為部落一姓之中復分為小部

落大者萬餘騎小者數千騎不相統一有細封氏費聰氏往利氏頗超氏野辭氏旁當氏米貪氏拓拔氏最為強族俗皆土著有棟宇織犛牛及羊毛覆之俗尚武無法令賦役其人多壽年至百六十歲不事生產好為竊盜互相凌劫尤重復讎如未可得遂頭垢面洗足蔬食要斬讐人而復故常男女並皆衣裘褐仍被大氊不知耕稼土無五穀氣候多風寒以犛牛馬騾羊豕為食五月草始生八月霜雪降求大麥于他界醞以為酒妻

其庶母及伯叔母嫂子姪之婦淫穢蒸報諸夷中最為
甚然不婚同姓老者則仰天椎胸而悲哭焚之名為
火葬無文字但俟草木以記歲時

貞觀三年南會州都督鄭元璠遣招諭其長細部賴舉
部內附亦自入朝列其地為軌州拜部賴為之刺史其
後諸部相次內附列其地為岢奉巖遠四州各拜首領
為刺史五年詔遣使開其河曲地為六十州內附者三
十四萬口有羌豪拓拔赤詞者甚為渾主伏尤所暱與

之結婚屢抗官軍後與其從子思頭並率衆與諸首領
歸款列其地為懿嵯麟可等三十二州以松州為都督
府羈縻存撫之拜赤詞為西戎州都督賜姓李氏自是
從阿首大積石山以來並為中國之境後吐蕃強盛拓
拔氏漸為所逼遂請內徙始移之于慶州因置靜邊等
州以處之故地陷于吐蕃其處者為其役屬吐蕃謂之
彌事又有黑党項在水之西李靖之西討也渾主乞伏
奔之處以空閒之地及吐谷渾舉國內屬其黑党項首

領號救善其年因貢方物其雪山党項姓破丑氏居山之下貞觀初亦常朝貢又有白狗赤桑白蘭等諸羌自龍朔以後並為吐蕃所破而服屬焉其在西北邊者天授三年內附凡二十萬口分其地置朝吳浮歸等十州仍散居靈夏等界內自至德已後常為吐蕃所誘密以官告授之使為偵導故時或侵叛尋亦底寧至寶應初其首領來朝請助國供靈州軍糧優詔贊美其在涇隴州界者至後上元元年率其衆十餘萬詣鳳翔節度使

崔光遠請降

寶慶元年十二月其歸順州部落乾封州部落歸義州
部落順化州部落和寧州部落和義州部落寶善州部
落寧定州部落羅雲州部落朝鳳州部落並詣山南西
道都防禦使梁州刺史臧希讓請冊印讓以聞詔從之
貞元三年十二月初禁商賈以口馬器械于党項部落
貨易十二年二月六州党項自石州奔過河西党項有
大府部落曰野利越詩龍兒野利厥律兒黃野海野寧

等居慶州者號為東山部落居夏州者號為平夏部落
永泰大厯以後居石州依水草至永安城鎮將阿使那
思曠擾其部落求取駝馬無厭中使又贊成其事党項
不堪其弊遂率部落奔過河

元和元年七月宰相杜佑上疏曰伏見近者党項與西
戎潛通屢有降人指陳事蹟而公卿廷議以為宜當謹
兵備戒侵軼益發甲卒邀其寇暴此蓋未達事機匹夫
之常論耳夫蠻戎為患自古有之周宣以獫狁為害但

命南仲往城朔方驅之太原及是而止誠不欲弊中國
怒遠人也秦平六國恃其兵力北築長城以拒匈奴西
逐諸羌出于塞外勞力擾人結怨階亂中國未靜賊徒
競起海內雲擾實生謫戍漢武因文景之富命將興師
遂至戶口減半竟下哀痛之詔罷役輪臺前史書之為
嘉其迷而能復蓋聖王之理天下也惟務綏靜蒸人西
至流沙東漸于海在南與北示存聲教不以遠物為珍
重求遐方入貢蓋疲內而事外終得少而失多故前代

納忠之臣並有諫君之議淮南王請息師于閩越賈捐之願棄地于珠崖安危利害高懸前史昔馮奉世矯漢帝之詔擊莎車傳其王首于京師威振西域宣帝大悅議加爵土之賞蕭望之獨以為矯制違命雖有功效不可為法恐後之奉使者爭遂發兵為國家生事述理明白其言遂行國家自天后以來突厥默啜兵強氣勇屢寇邊城為害頗甚開元初邊將郝靈荃親捕斬之傳首闕下自以為功伐莫二坐自望寵爵宋璟為相慮武臣

邀功為國生事止授以郎將由是訖開元間無人復議
開邊中國遂寧外藩亦靜此皆成敗可徵鑒誠非遠其
党項小蕃雖處中國本懷我德當示撫綏間者邊將非
廉亟有侵刻或利其羊馬或取其子女使竭其方物徵
為役徒怨苦既多叛已遂起或與吐蕃通使或與西戎
寇連有為使然固當懲革傳曰遠人不服則修文德以
來之管子曰國家無使勇猛為邊境此誠聖哲識微知著
之遠畧也今戎醜方強邊備未實誠慎擇良將誠之完

輯使知誠信絕其求取用示懷柔來則懲禦去則謹脩
自然彼懷我德革其奸謀何必遽圖興師坐致勞費陛
下上聖至仁覆育羣類動必師古謀無不臧伏望堅保
永圖置之衽席實天下幸甚上深嘉納之

九年五月復置宥州以護党項

十五年七月鹽州送刼烏自池鹽女子拓拔三娘并婢
二人召入內詰之赦罪送本州其年十一月命太子中
允李寮為宣撫党項使以部落繁富至今遠近商賈賈

雜繒諸貨入其部落貨其牛馬至太和開成之際其蕃
鎮統領無緒恣其貪恠不顧危亡或強市其羊馬者不
時償其直以是部落苦之遂相率為盜靈鹽之路小梗
會昌初上頻命使安撫之兼命憲臣為使分三印以統
之在邠寧鄜延者以侍御史內供奉崔彥曾統之

唐會要卷九十八

欽定四庫全書

唐會要卷九十九

宋 王溥 撰

東謝蠻

在黔州之西數百里南接守宮獠西連夷子北至白蠻
土宜五穀無字刻木為契散在山谷依樹為居無稅賦
之事皆自為生業刀劍不離身男女椎髻以緋束之後
垂向下其首領謝元深世為豪長謝氏一族法不育女

自云高姓不可下嫁也

貞觀三年元深入朝冠烏熊皮冠若今之髻頭以金絡

額身披毛帔韋皮行勝而著履

中書侍郎顏師古奏言昔武王時天下太平遠

國歸款國史習其事為王會篇今萬國來朝至如此輩章服實可圖寫今請撰為王會圖從之以其地

為應州拜元深刺史隸黔州都督府又有南謝首領謝強與西謝蠻連接共元深俱來朝拜為南壽州刺史後改為莊州

貞元十三年正月西南蕃大豪長正議大夫檢校蠻州

長史繼襲蠻州刺史資陽郡開國公賜紫金魚袋宋鼎
左右大首領朝散大夫前檢校邛州刺史賜紫金魚袋
謝汕左右大首領繼襲攝蠻州巴江縣令賜紫金魚袋
萬傳界首子弟大首領朝散大夫牂州錄事參軍謝文
經黔中經畧招討觀察使王礎奏前件刺史建中三年
一度朝賀自後更不許隨例入朝今年懇訴稱州接牂
牁同被聲教獨此排擯竊自慚恥謹遣隨牂牁等朝賀
伏乞賜優諭兼同牂牁刺史授官其牂牁蠻兩州戶口

殷盛人力強大鄰側諸蕃悉皆敬憚請比兩州每三年一度朝賀仍依牂牁輪環差定并以才幹位望為衆所推者充勅旨宋鼎等已改官訖餘依奏

西趙蠻

在東謝之南其界東至夷子西至昆明南至西洱河山洞深阻莫知里數南北十八日行東西二十三日行其風俗與東謝同趙氏世為豪長有萬餘戶口

貞觀三年遣使入朝二十一年以其地為明州以首領

趙摩為刺史

牂牁蠻

亦姓謝氏西至昆明九百里土氣鬱熱稻再熟無徭役
刻木為契風俗物產與東謝同

貞觀二年首領謝龍羽遣使朝貢授牂牁州刺史封夜
郎郡公四年十二月遣使朝貢

開元十年閏五月大豪長謝元齊死詔立其嫡孫嘉藝
襲其官封至十五年其大豪長趙君道來朝且獻方物

大厯中每歲遣使朝貢及貞元初朝獻不絕至七年二月授其豪長趙主俗官以其歲初朝貢不絕褒之也自七年後至十八年凡五遣使來朝貢

元和二年五月勅自今以後委黔南觀察使差本道軍將充押領牂牁昆明等使至四年正月又遣使來朝是月遣中使魏德和領其使并賫國信物赴牂牁仍以璽書賜其王馬七年十二月遣使朝貢九年復遣使謝注二十人朝貢十一年正月遣使來朝拜其豪長等官仍

賜告身一十六道遣還十二月又遣使二十五人賀正
台對於三殿仍賜宴及銀器錦綵等長慶中朝貢不絕
寶歷元年十二月遣使謝良震來朝自大和五年至
會昌二年凡七遣使朝貢并賀正皆寵以宴賜
凡外蕃使將至遣中使郊驛迎勞既至恩禮甚厚將
歸亦送以懷遠人今悉不書省文也

南詔蠻

北與邛州接部落四千餘戶山有毒草沙蟲及蝮蛇人

並樓居登梯而上號為千欄其人美髮為椎髻土多女
少男為婚者女氏必先買求男族貧人無以為嫁女多
賣與富人為婢俗皆婦執役其王姓朱氏號為劍荔王
貞觀三年遣使內附以其地隸渝州

大厯十四年十月吐蕃率南蠻二十萬衆來寇一入茂
州過文川及灌且入扶文過方維白壩一入黎雅過邛
邛連陷郡邑乃發禁兵四千人及幽州兵馬五千人同
討大破之

貞元十年三月劍南節度使韋臯奏雲南蠻王異牟尋
領部落兵馬破吐蕃并收鐵橋等以來城壘等擒吐蕃
列土王五人歸降百姓一十二萬人約計三萬餘戶大
小城一十六所勅旨宣付所司其年七月詔賜南蠻異
牟尋鑄印一用黃金銀為窠其文曰貞元冊南詔印先
是劍南西川節度使韋臯奏南詔前遣清平官尹求寬
獻所授吐蕃印五二用黃金今賜印請以黃金從蠻夷
所重從之九月南詔又使蒙湊羅棟及清平官尹求寬

來獻鐸樂浪人劍及吐蕃印八蒙奏羅棟異牟尋之弟也既朝見于麟德殿上所賜賚甚厚其年十月以南詔朝貢使尹求寬為檢校左散騎常侍其餘授官各有差至十一年九月異牟尋遣使獻馬六十匹至十二年韋臯奏于雅州會野路招受得投降蠻首領高萬唐等六十九人蠻約七千戶二萬口兼萬唐等先授吐蕃金字告身五十片至十四年十二月南詔異牟尋遣首望大將軍王邱谷等賀正兼獻方物等至十九年春正月

癸丑朔上御含光殿受南詔朝賀以其使楊漢龍武為
試太僕少卿授黎州廓清道蠻首領襲恭化郡王劉志
寧試太常卿

永貞元年南詔遣使趙迦寬來赴德宗山陵

元和二年八月授南詔使者鄧傍傳試殿中監其年十
二月復遣使朝賀三年十一月以南詔異牟尋卒廢朝
三日辛未以諫議大夫段平仲兼御史中丞持節充冊
立南詔及弔祭使仍命鑄元和冊南詔印司封員外郎

李逢吉副之至四年正月以太常卿武少儀兼御史中丞充冊立及弔祭使先是諫議大夫段平仲充使朝廷以為諫官不合離闕因罷平仲使少儀遂有是行冊異牟尋之子驃信苴蒙閣勅為南詔至七年十二月南詔遣使朝貢十年十一月南詔蠻使楊還奇等二十九人來朝至十三年四月劍南西川節度使奏南詔請貢獻助軍牛羊奴婢等上發詔褒之不進獻

太和三年宰相臣杜元穎鎮守西川以文儒自高不練戎

事南蠻棄我無備入寇黎州牧守屢陳皆不信之十月
黎州陷十一月犯我西川騷劫玉帛子女而去即日鄰
境以狀聞上大怒貶元穎為邵州刺史不入又貶為循
州司馬命東川節度使部釗代焉明年春正月其王蒙
嗟顛以表自陳請罪兼疏元穎過失國家方事柔遠尋
宥過自後賦貢不絕

開成四年正月上御龍德殿入對朝賀正南詔首趙莫
三十七人賜官告并錦綵銀器金銀帶衣服等有差至

五年十二月上御三殿對歸國等十六人

會昌二年正月三殿對還蕃南詔酋望張元佐等二十
五人大中八年二月南蠻遣進犀牛詔還之

咸通十年十一月南蠻驃信坦綽首龍率衆二十萬寇
舊州定邊軍節度都頭安再榮守清溪關為賊所攻再
榮退保太度河北去清溪間二百里隔水相射凡九日
定邊軍節度使竇滂勒兵拒之十二月驃信遣清平官
十餘人來偽和與竇滂語次蠻軍船棧競渡忠武武寧

兵士結陳抗之蠻軍稍却竇滂懼將自縊於帳中徐州
將苗全緒止之滂乃宵遁全緒乃夜入蠻軍萬弩亂發
軍中大駭全緒等保軍而還蠻軍乘勝進攻西川朝廷
以顏慶復為大渡河制劍南應接等使將兵數萬與忠
武武寧之軍合勢戰于漢川之昆橋大捷蠻軍走解西
川之圍

乾符元年十二月南蠻復寇西蜀詔河東河西山南西
道東川之兵赴援節度使高駢奏西川新舊軍差已衆

況蠻小醜必易今已道路崎嶇館驛窮困更有軍頓立
見流移其左神策長武鎮鄜州河東所抽兵中人數不
少況備辦軍食費損尤多又緣三道鎮書扼羌戎邊鄙
未寧望不差發詔除河東路兵士令竇瀚不要差發外
餘三處兵士委高駘到日分布驅使三年十一月邕州
節度使辛讜奏南詔遣使段琬寶等四人通和詔令答
使許之至五年七月讜遣從事徐雲叟通和凡水陸四
十七程至善闕府遇驛信

華言君上也

遊獵尚去雲南一十

六程叙好而還進南詔錄三卷

東女國

西羌之別種

以西海中有女國故稱東女國也

俗以女為王東與茂州

党項接隅女羅蠻及白狼夷有十八餘城王所別居名

康延州中有弱水南流用牛皮為船以渡戶口四萬女

王號為賓就有女官號曰高霸評議國事在外官寮並

男夫為之五日一聽政女王若死國中多歛錢動至數

萬更于王族求令女二人而立之大者為大王小者為

小王若大王死則小王繼立或姑死而婦繼無篡奪所
居皆起重屋王至九層國人至六層其王服青毛裙下
領衫其袖委地重女而輕丈夫文字同于天竺以十一
月為正每歲至十月令巫者賣酒穀詣山中散糟麥于
空大吶呼鳥俄頃有鳥如雉飛入巫者杯中因剖其腹
視之有一穀米歲必登若有霜雪必多異災其俗信之
名為烏卜武德中女王湯滂氏遣使貢方物

永徽七年正月其國遣女使高霸黎文并其主男三盧

等來朝

垂拱五年其王歛臂遣大臣湯劒左來朝仍請官號則
天拜歛臂為左衛員外將軍仍以瑞錦制蕃服賜之
天授三年其主俄玻兒爾來朝萬歲通天元年又遣使
來朝

開元二十九年十二月其王趙曳夫遣子獻方物

天寶元年五月命有司宴之于曲江令宰臣以下同宴
又封曳夫為歸昌王授左金吾衛大將軍賜其子帛八

十匹放還後復以男子為王

貞元九年其王湯立悉與哥鄰國王董卧庭白狗國王
羅陀忽逋租國王弟鄧吉知南水國王姪薛尚悉羸弱
水國王董辟和悉董國王湯息贊清遠國王蘇唐磨咄
霸國王董藐蓬各率其種落詣劍南西川內附其哥鄰
等國皆散居西山弱水王即國初女國之弱水部落其
悉董國在弱水之西故亦謂之弱水西悉董王舊皆分
隸邊郡祖父例授將軍中郎果毅等官自中原多故皆

為吐蕃所役屬其部落者大不過二三千各置縣令數
人理之土有絲絮歲輸于吐蕃至是立悉與之同盟相
率獻款兼賣天寶中國家所賜官告共三十九道以進
節度使韋皋處其衆于維霸保等州給以種糧耕牛咸
樂生業立悉等數國王自來朝召見于麟德殿授立悉
銀青光祿大夫歸化州刺史鄧吉知試大府少卿兼丹
州長史薛尚悉曩試少府少監兼霸州長史董卧庭行
至綿州卒贈武德州刺史命其子利羅為保寧都督府

長史襲哥隣國王立悲妹乞悲漫頗有才智從其兄來
朝封和義郡夫人其大首領董卧卿等皆授以官俄又
授女國王兄湯厥銀青光祿大夫試太府卿清遠王弟
蘇歷顛銀青光祿大夫試衛尉卿南國王薛莫庭及湯
息讚董貌蓬女國唱後湯佛庭美王鉢南郎唐並授
銀青光祿大夫試太僕卿其年西山松州羌王等二萬
餘戶相率內附其粘信部落主董夢葱龍諾部落主董
辟忽皆授試衛尉卿立悲等並赴明年元會訖賜以金

帛各遣還八月詔加韋臯統押近界諸蠻及西山國使
其部落至今猶代襲刺史等官然亦潛通吐蕃故謂之
兩面羌

婆利國

婆利國者南荒之國也在林邑東南海行可萬里其地
延袤數千里暑熱恒如國中之盛夏穀一歲再熟王姓
刹利邪伽名護路那婆世有其位人皆黑色穿耳附璫其王
戴花飾以真珠瓔珞身坐金牀行則駕象鳴金擊鼓吹

蟲

貞觀四年四月使至婆利界有羅刹國其人極陋朱髮
黑身獸牙鷹爪特與林邑人作市已夜而自掩其面其
國出火珠狀如水晶日正午時以珠承影取艾衣之即
火出其年林邑國來獻云羅刹國得之或云出師子國
其國在西海之中出奇寶商人到則不見但署寶物價
直置于洲上商人依價貨之而去以其多子故以為國
名

倭國

古倭奴國也在新羅東南居大海之中世與中國通其
王姓阿每氏設官十二等俗有文字敬佛法椎髻無冠
帶隋煬帝賜衣冠令以錦綵為冠飾衣服之制頗類新
羅腰佩金花長八寸左右各數枚以明貴賤等級

貞觀十五年十一月使至太宗矜其路遠遣高表仁持

節撫之表仁浮海數月方至

自云路經地獄之門親見
其上氣色蒨鬱又聞呼叫

鉗鍛之聲甚
可畏懼也

表仁無綏遠之才與王子爭禮不宣朝命而

還由是復絕

永徽五年十二月遣使獻琥珀瑪瑙琥珀大如斗瑪瑙大如五升器高宗降書慰撫之仍云王國與新羅接近新羅數為高麗百濟所侵若有危急王宜遣兵救之倭國東海嶼中野人有耶古波耶多尼三國皆附庸於倭止限大海西北接百濟正北抵新羅西南與越州相接亦頗有絲綿出瑪瑙有黃白二色其琥珀好者云海湧出

咸亨元年三月遣使賀平高麗爾後繼來朝貢則天時
自言其國近日所出故號日本國蓋惡其名不雅而改
之

大曆十二年遣大使朝楫寧副使聰達朝貢

建中元年又遣大使真人興能判官調楫志自明州路
奉表獻方物真人興能蓋其官名也風調甚高善書翰
其本國紙似蠶而緊滑人莫能名

貞元十五年其國有二百人浮海至揚州市易而還

永貞元年十二月遣使真人遠誠等來朝貢
開成四年正月遣使薛原朝常嗣等來朝貢

大羊同國

東接吐蕃西接小羊同北直于闐東西千里勝兵八九
萬結髮羶裘畜牧為業地多風雪冰厚丈餘物產與吐
蕃同無文字但刻木結繩而已豪長死扶去其腦實以
珠玉剖其五臟易以黃金鼻銀齒以人為殉卜以吉辰
歲諸巖穴他人莫知其所多殺牝牛草馬以充祭其王

姓姜葛有四大臣分掌國事自古未通中國

貞觀五年十二月朝貢使至十五年間中國威儀之盛
乃遣使朝貢太宗嘉其遠來以禮答慰焉至貞觀末為
吐蕃所滅分其部衆散至隙地

烏羅渾國

蓋後魏烏洛侯也今亦謂之烏羅護東與靺鞨南與契
丹北與烏丸為鄰風土與靺鞨同

貞觀六年朝貢使至

女國

在葱嶺之西以女為王每居層樓侍女數百五日一聽政其王若死無女嗣位國人乃調歛金錢還于死王之族買女而立之其俗貴女子賤丈夫婦人為吏職男子為軍士女子貴者則多有侍男男子貴不得有侍女雖賤庶之女盡為家長猶有數夫焉生子皆從母姓男子披髮以青綠塗面婦人辮髮而縈之土宜六畜多駿馬貞觀八年十二月朝貢使至

石國

石國其俗善戰多良馬西北去瓜州六千里

貞觀八年十二月朝貢使至

顯慶三年列其地噉羯城為大宛都督府仍以其王職吐屯攝舍提於屈昭穆為都督

開元初其蕃王莫賀咄吐屯有功封為石國王加特進尋又冊為順義王二十九年其王伊吐屯屈勒遣使上表曰臣自干代以來於國忠赤祇如突厥騎施可汗忠

赤之中部落安帖後背天可汗脚底大起今突厥屬天
可汗在于西頭為患惟有大石莫踰突厥伏乞天恩不
棄突厥部落打得大石諸國自然安帖

天寶初累遣朝貢至五年封其王子那俱車鼻施為懷
化王并賜鐵券九載安西節度使高仙芝奏其王蕃禮
有虧請討之其王約降仙芝使部送去開遠門數十里
負約以王為俘獻于闐下斬之自後西域皆怨仙芝所
擒王之子西走大石引其兵至怛羅欺城仙芝軍大為

所敗自是西附于大石

寶應二年及大厯七年並遣使朝貢

吐火羅國

在葱嶺之西數百里與揖怛離居勝兵五萬國近吐蕃
多男子少婦人故兄弟通室婦人五夫則首戴五角十
夫則首戴十角男子無兄弟則與他人結為昆季方始
得妻不然則終身無婦矣被服文字與于闐畧同其有
屋類頗黎山南岩穴中有神馬國人每牧馬于其側產

名駒汗血馬北界接西域大宛之地

貞觀九年五月朝貢使至

永徽元年獻大鳥高七尺其色玄足如蛇鼓翅而行三百里能噉鐵夷俗謂之駝鳥三年其葉護那火烏涅波奉表告立高宗遣置州縣使王名遠到其國所以理阿緩大城為月氏都督府仍分其小城為二十四州以烏涅波為都督五年烏涅波遣子伊室達官弩來朝

龍朔元年授烏涅波使持節月支等二十五州諸軍事

月支都督

麟德二年遣其弟祖紇多獻瑪瑙燈樹兩具高三尺餘
開元七年其葉護支汗那帝賒上表獻吐火之人暮闍
請加試驗八年獻名馬及騷至十二年遣使獻神藥乾
陀婆羅等二百餘品十七年冊其首領骨咄祿頓達度
為葉護其年葉護遣使獻須那伽帝釋麥十八年遣使
獻紅頗梨碧頗梨青瑪瑙金精及質汗等藥

天寶八載其葉護失理忙伽羅遣使上表曰臣鄰境有

一賊號曰鶻師居在深山恃其險遠違背聖化親附吐蕃于國內置吐蕃城投勃律要路與吐蕃擬將兵入境臣每憂懼思破凶徒望請安西兵馬來助五月到小勃律六月到大勃律伏乞允臣所奏事若不成請斬臣七段緣失蜜王向漢忠赤特望勅書宣殿使其感恩玄宗覽表許之十二年又遣使朝貢

乾元元年七月與西域九國遣兵助國討逆詔宗令赴朔方行營

曇陵國

即吐火羅之屬國也居大州中其風俗土宜與吐火羅

同

貞觀十六年遣使朝貢

康國

本康居之苗裔也其王本姓溫氏其人土著役屬於突厥先居祁連之北昭武城為匈奴所破南依葱嶺遂有其地枝庶強盛分王鄰國皆以昭武為姓氏不忘本也

俗多蒲萄酒勝兵三千人深目高鼻多鬚髯生子必以蜜納口中以膠置手內欲其成長口常甘言持錢如膠之粘物習書善賈爭分銖之利男子二十即送之他國來過中夏利之所在無所不至以十二月為歲首有婆羅門為其占星候氣以定吉凶至十一月鼓舞乞寒以水相潑盛為戲樂

武德七年其王屈木支遣使獻名馬

貞觀九年七月獻獅子太宗嘉其遠來使秘書監虞世

南為之賦十一月又獻金桃銀桃詔令植于苑
永徽中其國頻遣使告為大石所攻兼徵賦稅

顯慶三年高宗遣果毅董寄生列其所居城為康居都
督府仍以其王拂呼纓為都督

萬歲通天元年則天封其大首領篤沙鉢提為王鉢提
尋卒又冊立其子泥涅師師神龍中泥涅師師卒又冊
立其子突昏

開元初屢遣使獻鑠子甲水晶珠越諾及侏儒人胡旋

女子兼狗豹之類十九年其王烏勒王表請封其子咄
曷為曹國王默噶為永國王許之二十七年烏勒卒遣
使冊咄曷襲其父位

天寶三載又封為欽化王其母可敦封為郡夫人十一
載十三載並遣使朝貢

盤盤國

在林邑東南海曲中與狼牙之修國為隣習俗與扶南
畧同以路遠不與中國通梁大同時來朝貢

貞觀九年朝貢使至

朱俱婆國

在葱嶺之北二百里勝兵三千人其俗崇飾佛法文字同於婆羅門西與盤陀為鄰去瓜州三千八百里

貞觀十一年十二月朝貢使至

甘棠國

在大海之南崑崙人也

貞觀十年與朱俱婆朝貢同日至太宗謂羣臣曰南荒

西域自遠而至其故何哉房玄齡曰當中國又安帝德遐被也太宗曰誠如公言向使中國不安何緣而至朕何以堪之觀此蕃使益懷畏懼所望公等匡朕不逮也

蜀賓國

在葱嶺之南其地有涇水皆南流注于南海人皆棄象土宜種稻多甘蔗葡萄草木凌寒不死尤信佛法南去舍衛國三千五百里罕通上國聞中夏有聖君故遣使來朝

貞觀十一年遣使至上謂長孫無忌曰朕即位之初有
上書者或言人主必須威權獨運不得委羣下或欲耀
兵振武攝服四夷維魏徵勸朕偃武興文布德施惠中
國既安遠人自服朕從其語天下大寧絕域君長皆來
朝貢九夷重譯相望于道路此皆魏徵之力也朕之任
用豈不得人二十二年其國遣使獻俱物頭花丹白相
間其香遠聞

永徽二年獻褥特鼠喙尖尾赤能食蛇

顯慶三年訪其國俗云王始祖磬薛今王曰曷禰支父
子傳位已十二代其年列其城為修鮮都督府龍朔初
授其王修鮮等十一州諸軍事兼修鮮都督

開元七年遣使獻天文經及秘要藥方八年詔遣冊其王
為葛羅達支特勒二十七年其王烏散特勒灑以年老
上表請嫡子拂菻剌婆剌嗣位許之仍降使冊命

天寶四載又冊其子敦箇準為襲剌賓及烏長國王仍
授右驍衛將軍

乾元元年又遣使朝貢

流鬼國

去京師一萬五千里邊北海多溫澤有漁鹽之利地氣
沍寒每堅冰之後以木廣六寸長七尺施系于其上以
踐層冰遂及奔獸俗多狗以其皮毛為裘褐勝兵萬人
南與萬設靺鞨鄰接未嘗通聘中國

貞觀十四年三月重譯而來朝貢

史國

居近獨莫水北與康國同域中有神祠每祭羊十口自隋以來國漸強盛乃創置使為城郭都邑二萬餘家

貞觀十六年正月朝貢使至

顯慶三年遣果毅董寄生列其所治為祛沙州以其王昭武失阿曷為刺史

開元十五年其王阿忽必多延屯遣使獻胡旋女子及豹二十七年多延屯卒冊立其子阿忽鉢為王二十九年其王斯謹提立首領勃帝未施朝貢天寶中詔使其

國為米成國其那色波國亦謂之小史國為史國役屬

拂菻國

一名大秦在西海之國北東南與波斯接地方萬里列城四百邑居連屬其宮室柱枕多以水晶琉璃為之有貴臣十二共理國正事常使一人將囊隨王車百姓有事者即以事投囊中王至宮省發理其枉直其王無常人簡賢者立之國有災異及風雨不時即廢之有鳥似鶴其毛綠色常在王邊倚枕上坐每進食有毒其鳥輒

鳴戶十萬餘南臨大海城東面有一大門高二丈飾以黃金凡有大門三重第二大門之樓懸一金秤以金丸十二枚係于衡端以候日之十二時焉為一金人其大如人立於側每至一時其金丸輒落鏗然發聲金人即應聲引唱以紀日時毫釐無差其殿以瑟瑟為柱黃金為地象牙為門扇香木為棟梁無瓦以白石末塗屋上如玉石焉盛夏之時引水潛上屋四簷飛溜激氣成涼風有羊生于土中其國人候其欲萌乃築墻以院之

防外獸所食然其臍與地連割之則死惟人著甲走馬
及擊銅鼓以駭之其羊驚鳴而臍絕便逐水草諸珍寶
多出其國隋煬帝常欲通之竟不能致

貞觀十七年其王波多力遣使獻赤頗璃石綠金精等
物後臣大食國

乾封元年遣使獻底陀伽大定二年復遣使朝貢

開元十年正月遣吐火羅大首領獻獅子二羖羊二四
月又遣大德僧來朝

烏養國

在中天竺南一名烏枝那地方千餘里百姓殷實人性懦弱頗詭詐尤工禁呪之術寫信佛法與天竺同而天竺不及之自古未通中國焉

貞觀十六年十一月朝獻使至

開元八年四月遣使冊立其王時大食東與烏養隣境扇誘為虐其王與骨咄王俱位王皆守節不應亦潛輸款誠玄宗深美之故並降冊命

陀洹國

吐火羅西北其王姓察失利字婆那其國海行五月至
廣州土無蠶桑以白疊朝霞布為衣穀有稻麥俗皆樓
居謂之干欄父母死停喪在室輒數日不食燭屍之後
男女並剔頭臨池先浴然後進食

貞觀十八年遣使來朝貢

唐會要卷九十九

欽定四庫全書

唐會要卷一百

宋 王溥 撰

瑟匿國

北接石國其俗不好商賈風俗與康國畧同

貞觀二十年三月使至朝貢與役槃國康國同隣出好馬

悉立國

在吐蕃西南戶五萬勝兵五千人其地有城邑村落咸依溪澗男夫以繒線纏頭衣氍毹婦人辮髮著短裙婚姻簡畧不行財禮以蒸報為俗多水牛宜秔稻喪制以黑為衣一年就吉羈事吐蕃自古未通中國

貞觀二十年閏三月朝貢使至

求拔國

或云章揭拔本西羌種也在悲立西南居四山之內近西移出山西接東天竺遂改衣服變西羌之國因而附

焉勝兵二千無城郭好為寇掠商旅患之

貞觀二十五年因悉立而朝貢使至

俱蘭國

前亦名俱羅拏國與吐火羅接南抵雪山地險窄物產
惟出金精

貞觀二十年閏三月朝貢使至

骨利幹國

居迴紇北方幹海之北二俟斤同居勝兵四千五百口

萬餘人草多百合吐出名馬其國北接溟海晝長夕短
日沒後天色正曛煮一羊胛纔熟而東方已曙蓋近日
出之所也

貞觀二十一年正月內附

訶陵國

在真臘之內海中洲王之所居堅木為城造大屋重閣
以象為牀以柳花為酒飲之亦醉有毒人與常人居止
宿處即令身上生瘡與之交會即死苦旋液露著草木

即枯

貞觀二十二年朝貢使至

開元十八年訶陵國遣使獻僧祇幢及五色鸚鵡頻伽
鳥并異香

天寶十三載十一月獻僧者女二人及玳瑁蓋生犀等
婆登國

在林邑之南海行一月東與訶陵西與迷黎連接北鄰
大海風俗與訶陵國同種穀每月一熟有文字書于貝

多葉其死者口實以金又以金釧貫于四肢然後加以
婆律膏及沈檀龍腦等香積薪以燔之

貞觀二十一年六月朝獻使至

波斯國

在京師西一萬五千里戶數十萬其王初嗣位便密選
諸子才堪承統者名字封而藏之王死後大臣與王之
羣子共發封而視之奏所書名為王焉俗事天地日月
水火諸神西域諸國事火祆者皆詣波斯受法焉以六

月一日為歲首繫囚無年限惟王代立則釋之地多名
馬駿者日行七百里又多駿犬今所謂波斯犬也出驢
及大驢

貞觀二十一年其王伊嗣俟遣使朝貢

龍朔元年其國王畢路斯奏頻被大食侵擾請兵救援
之詔遣隴州南田縣令王名遠使西域分置州縣因列
其地陵城為波斯都督府授畢路斯為都督是後數遣
使貢獻焉咸亨中畢路斯來朝貢高宗甚加恩賜拜右

武衛將軍

儀鳳三年令吏部侍郎裴行儉將軍兵冊送畢路斯還波斯國行儉以路遠至安西碎葉而還畢路斯獨返不得入其國漸為大食所侵客於吐火羅三十餘年部落數千人後漸離散至景龍二年來朝拜為左威衛將軍無病卒其國遂滅西部衆猶存自開元七年至天寶六載凡十遣使朝貢獻方物夏四月遣使獻瑪瑙牀九載獻大毛繡舞筵長繡舞筵無孔真珠至大曆六年九月

遣使獻真珠等

都播國

鐵勒之別種也回紇南十三日行前代未之道也分為三部自祖統攝其俗結草為廬無牛羊不知耕種土多百合取其根以為糧衣豹鹿之皮貧者亦緝鳥羽為服婚姻富者用馬貧者用鹿皮為聘禮國無刑罰偷盜者倍徵其賦聞骨利幹來道亦遣使朝貢

貞觀二十一年十一月朝貢使至

結骨國

在同統西北三十里勝兵八萬口數十萬南阻貪縵山
有水從迴統北流踰山經其國人並依水而居身悉長
大赤色綠睛朱髮有黑髮以為不祥人皆勁勇隣國憚
之其大與突厥同而婚姻無財聘性多淫佚與外人通
者不忌其瘞死喪刀斃其面火葬收其骨踰年而葬以
木為室覆以木皮天每雨鐵收而用之以為刀劍甚鉅
利若獵獸皆乘木馬升降山磴追赴若飛其北有駟馬

國鄰北海畜駟馬而不乘但取其酪充飧而已貌類結骨而不敦隣好交相侵伐

貞觀二十一年二月結骨國君長遠遂身入朝云臣段一心歸國望得國家官職執笏而還遂授左衛大將軍堅昆都督開元中安西都護蓋嘉惠撰西域記云堅昆國人皆赤髮綠睛其有黑髮黑睛者則李陵之後故其人稱是都尉苗裔亦有由然今有改稱紇提斯者亦是當時舊號今按國史叙鐵勒種類云伊吾以西焉耆以

北旁白山則有契弊烏護紇骨子其契弊即契弊苾也
烏護則烏紇也後為迴鶻其紇骨即紇提斯也由是而
言蓋鐵勒之種嘗以稱迴鶻矣其轉為點戛斯者蓋夷
音有緩急即傳譯語不同其或稱戛戛斯者語急而然
耳於史譯云點戛是黃頭赤面義即以為迴鶻所呼今
使者稱自有此名未知孰是

會昌三年其國遣使注吾合索

上聲呼之

等七人來朝兼獻

馬二疋以其久不修貢且莫詳更改之名中旨訪求唯

賈耽所撰四夷述具載黠戛斯之號始知耽之通習荒服灼然不誤先是迴鶻背恩德侵劫諸部落又擅入靈州上以為天亡不可容也乃命河東等道兵討之正月命河東兵大破迴鶻于殺狐山就帳中奉太和公主歸於我軍可汗亦與數十騎踰山遁走黠戛斯乘其破亡遂有其國二月遣使注吾合索等七人來朝并獻名馬且憑大唐威德求冊命焉四年上命太僕卿兼御史中丞趙蕃持節宣慰五年五月勅我國家光澤四海君臨

八荒聲教所覃冊命咸被況乎族稱宗姓地接封疆爰
申建立之恩用廣懷來之道有加常典得不敬承點戛
斯國王生窮陰之鄉稟沍朔之氣少卿之後胄裔且異
於蕃夷大漠之中英傑自雄於種落日者居於絕徼隔
以強隣空馳向化之心莫通事大之禮旋能奮其武勇
清彼朔陲萬里歸誠重譯而至時既當於無外義必在
於固存是用特降徽章載明深懇加其美號錫以冊書
貽厥後昆遂荒有北舉茲盛典彰示遠戎祇服寵光永

孚恩化可冊為宗英雄武誠明可汗命右散騎常侍兼
御史中丞李葉持節冊使仍命有司擇日備禮冊命六
年九月勅去歲先帝冊立黠戛斯為可汗雖有成命旋
屬朝廷變故未果遵行今欲遣使且展封告之儀續行
先帝之意又慮深僻小國不足與之抗衡迴鶻向殘不
合遽有建置斯事體大須歸至當必詢於衆方免有疑
宜令中書門下五品已上御史臺尚書省四品已上集
議聞奏大中元年遂命鴻臚卿御史中丞李葉持節再

冊命焉

天竺國

即漢之身毒或云摩伽佗或云婆羅門地在葱嶺之南
去月氏東南數千里地方三萬餘里其中分為五南天竺
南際大海北天竺北距雪山四周有山為壁南面一谷
通為國門東天竺東際大海與扶南連但隔小海而已
西天竺與罽賓波斯相接中天竺據四天竺之間國並
有王而俱以天竺為名隋煬帝志通西域諸國多至惟

天竺不通

貞觀初年中國沙門玄奘至其中國天竺王尸羅逸多
謂玄奘曰吾聞中國有聖王作出秦王破陣樂試為我
說秦王之為人也玄奘具言聖德王曰信如所言我當
自朝也至十五年自稱摩伽佗王遣使朝貢上乃遣雲
騎尉梁懷璈往通其國尸羅多大驚問諸國人曰自古
亦有摩訶震且使人至吾國乎皆曰未之有也乃遣使
隨懷璈來朝至二十二年四月遣使右衛長史王玄策

奉使天竺國至尸羅逸多死其國大亂發兵拒玄策遂

率吐蕃兵大破之虜其王以歸

太宗大悅謂侍臣曰夫

耽于臭味此敗德之尤若天竺不劫我使人豈為俘虜耶昔中山以貪寶取敵蜀侯以牛金致滅莫不由之是

時其國方士那邏通婆娑自言年二百云有長生之術上深禮之館之金廳門內造延年藥令兵部尚書崔禮

監主之發使天下采諸奇藥異石延厯歲月藥成服之無効後放還本國拜五巢為朝散大夫也

天授三年東天竺王摩羅拔摩西天竺王尸羅逸南天

竺王遮邏其跋羅婆吐天竺王那那中天竺王地婆西

那並來朝貢及中宗睿宗兩朝並獻方物

開元三年二月遣使瞿曇惠成來朝八年五月南天竺
遣使獻豹皮五色鸚鵡又奏請以戰象兵馬討大食吐
蕃求所以名其軍制書嘉馬號為懷德軍九月南天竺
王尸利那羅僧伽寶多拔摩為國造寺上表乞寺額勅
以歸化為寺名十一月遣使冊利那羅僧伽寶多為南
天竺王遣使朝十七年六月北天竺國王三藏沙門僧
密多獻質汗等藥十九年十月中天竺國王伊沙伏摩
遣其大德僧來朝獻方物二十九年三月中天竺國王

李承恩來朝投遊擊將軍放還

天寶中累遣使朝貢

歌邏祿國

本突厥之俗也城在金山之西與車鼻部落相接薛延陀破滅之後車鼻人衆漸大歌邏祿率其下以歸之及高駢之經畧車鼻也歌邏祿相繼來降仍發兵以討之後車鼻破滅歌邏祿摸刺婆蔔蹈實力三部落並詣朝見天寶初與迴鶻拔悉密等攻突騎他烏蘇來可汗

三年與拔悉密可汗同著表兼獻馬至闕下其年冬又與迴鶻同擊破拔悉密部落其可汗阿史那施奔北庭後朝于京師十三年授阿史那施左武衛將軍乾元中率拔悉密可汗南奔後葛祿與九姓部落復立迴鶻敦葉護可汗焉朝廷尋遣使封為奉義王仍號懷仁可汗自此後葛祿在烏往犍山左右者別置一都督隸屬九姓迴鶻其在金山及北庭館內者別立葉護每歲朝貢十一年葉護頓咎伽生擒突厥師阿布思送於闕庭授

開府儀同三司改封金山郡王至德後其衆漸盛與迴鶻為敵國仍移居十姓可汗之故地而碎葉阻還斯城新城盡為所踞然礙迴鶻近歲朝貢不通

泥婆羅國

在吐蕃之西其俗剪髮與肩齊穿耳揔竹簫緩至肩者以為妙麗食用手其器皆銅多商賈少田作以銅為錢面文為人背文為馬牛不穿孔衣服以一幅布蔽身數日一盥浴以板為屋壁皆雕畫俗重博戲頗解推測盈

虛皆通歷術事五天神鑄石為像每日清水浴神烹羊而祭其王那陵提婆身著真珠諸寶耳垂金鈎玉璫佩寶裝伏突坐獅子牀堂內散花燃香大臣及左右並坐於地有阿耆婆彌池週迴二十餘步以物投之即煙焰懸釜而炊須臾而熟

永徽二年其王尸利耶連陀羅遣使朝貢

大食國

波斯之別種也大業中有波斯回紇合亡命渡恒曷水

劫奪商旅其衆漸盛遂割據波斯西境自立為王其王
姓大食氏名噉蜜莫未臙自云有國已四十四年歷三
主矣俗勇于鬪戰土多沙石不堪耕種唯食駝馬肉西
隣大海常遣人乘船將衣糧入海經八年而未極西岸
中有一方石上有樹幹赤葉青上總生小兒長六寸見
人皆笑動其手脚既著樹枝若使摘取一枝小兒便死
永徽二年八月大食遣使朝貢至龍朔中擊破波斯又
破拂菻始有麴米之屬又南侵婆羅門吞併諸國勝兵

四十餘萬開元初遣使來朝進良馬寶鈿帶其使謁見
平立不拜云本國惟拜天神雖見王亦不拜所司屢詰
責之其使遂依漢法致拜令康國石國皆臣屬十三年
遣使蘇梨滿等十三人獻方物授果毅賜緋袍銀帶遣
還其境東西萬里東與突騎施相接焉又按賈耽四夷
述云隋開皇中大食族中有孤列種代為首長孤列種
中又有兩姓一號盆尼奚深一號盤泥末換其奚深後有
摩訶末者勇健多智衆立之為王東西征伐開地三千

里兼尅夏臘一名鈇

音所
鑒反

城摩訶末後十四代至末換末換

殺其兄伊疾而自立復殘忍其下怨之有呼羅珊木麤
人並波悉林舉義兵應者悉令著阜旬月間衆盛數萬
鼓行而西生擒末換殺之遂求得奚深種阿蒲羅拔立
之自末換以前謂之白衣大食自阿蒲羅拔以後改為
黑衣大食阿蒲羅拔卒立其弟阿蒲恭拂至德初遣使
朝貢代宗之為元帥亦用其國兵以收兩都實應初其
使又至恭拂卒子迷地立迷地卒子牟栖立牟栖卒弟

阿論立貞元二年遂與吐蕃為勁敵蕃兵大半西禦大
食故解為邊患其力不足也至十四年丁卯九月以黑
衣大食使含崖烏雞沙北三人並為中郎將放還蕃

大辭彌國

與波斯接風俗亦與波斯同

貞觀十九年三月遣使貢方物

駸馬國

其地近熱海在突厥北去京師一萬四千里經突厥大

部落五所乃至勝兵三萬馬萬匹地寒積雪至冬樹木
不彫者一二尺雪消以馬耕種五穀馬色並駁故以為
國號其使云去鬼國六十日行其國夜遊晝飲眼鼻牙
與中國人同口在頂上土無米粟噉鹿與蛇

永徽二年十一月朝貢使至

舍利毗迦國

在京師西南四萬餘里行經祇洹國訶陵國摩訶國新
國多薩國者埋國婆婁國多郎婆黃國摩羅迦國真臘

國林邑國乃至廣州東去俱羅國二千里西去赤土國
一千五百里南近婆庭舍衣朝霞白氎每食先泥上鋪
席而後坐其國王名本多陽牙前有隊伍甲鎗甲用貝
多樹皮風俗物產與真臘國同

多摩長國

居於南海島中使云其王先祖骨利龍之子利常得一
鳥卵割之得一女子容色殊妙因以為妻今尸羅勛傭
即其後地

顯慶四年二月朝貢使至

蝦夷國

海島中小國也其使鬚至長四尺尤善弓矢揮箭於首
令人戴瓠而立數十步射之無不中者

顯慶四年十月隨倭國使來朝

波羅舍利國

在南海之南接吐火羅國其王名蒲越摩伽精兵二萬
人其使以顯慶五年發本國至龍朔二年五月到京

日本國

倭國之別種以其國在日邊故以日本國為名或以倭國自惡其名不雅改為日本或云本舊小國吞併倭國之地其人入朝者多自矜大不以實對故中國疑焉

長安三年遣其大臣朝臣真人來朝貢方物朝臣真人者猶中國戶部尚書冠進德冠其項為花分而四散身服紫袍以帛為腰帶好讀經史解屬文容止溫雅則天宴之授司善卿而還

開元初又遣使來朝因請士授經詔四門助教趙元默就鴻臚教之乃遺元默潤幅布以為束修之禮題云白龜元年調布人亦疑其偽為題所得賜賚盡市史籍泛海而還其偏使朝臣仲滿慕中國之風因留不去改姓名為朝衡歷仕左補闕終右常侍安南都護

師子國

在西南大海中洲來使云其洲中有山名稜伽古佛遊處國中有王以一善化人皆以清淨學道為務

天寶五載正月使至獻鈿金寶璫及貝葉抄寫大般若經一部細白疊四十張

多義國

居大海之北周迴可兩月行南至海西俱遊國北波刺國東真陀洹國其王姓摩伽名失利戶口極衆置四十州又從屬佗國有城郭樓櫓宮殿並瓦木常侍衛兵可四千人雖有弓箭刀楯甲鞘而無戰陣有刑典書記及婚聘之禮事佛及神亦以十二月為歲畜有犀象馬牛

果有檳榔子其桃李及園蔬五穀與中國不殊
龍朔元年八月朝貢使至

耽羅國

在海居山島上周迴並接于海北去百濟可五日行其
王姓儒李名都羅無城隍分作五部落其屋宇為圓牆
以草蓋之戶口有八千有弓刀楯稍無文記唯事鬼神
常役屬百濟

龍朔元年八月朝貢使至

拘婁密國

在林邑之西陸路三月行山居饒象並養之以供用
顯慶元年閏正月來朝貢在盤盤致物國東南海路一
月行南去婆離國十日行東去不迷國五日行西北去
單國六日行風俗物產與赤土國墮和羅國畧同
永徽六年八月遣使獻五色鸚鵡

驃國

貞元十八年春正月南詔使來朝驃國王始遣其弟悉

利移來朝華言謂之驟自謂突羅朱闍婆人謂之徒里
拙自古來未嘗通中國魏晉間有見西南異方志及南
中八郡者云永昌古哀牢國也傳聞永昌西南三千里
有剽國君臣父子長幼有序然向無見史傳者其王聞
南詔異牟尋歸附心慕之乃因南詔重譯遣子朝貢東
北拒南詔咩苴城六千八百里凡去上都一萬四千里
在永昌故郡南二千餘里其境東西三千里往來通聘
者迦羅婆提等二十國後屬者道林王等九城食境土者

羅君潛等二百九十八部落東隣真臘國西接東天竺
國南溟海北通南詔此樂城界其王姓困沒長名摩羅
惹其國相名摩訶斯那其王近適則興以金繩牀遠適
則乘象嬪御甚衆傳御常數百人其羅城環以甃甃周
一百六十里壕岸亦用甃相傳本是舍利佛城內有居
人數萬家佛寺百餘區其堂宇皆金銀渥以丹彩地以
紫鑛覆以錦罽其俗好生惡殺其土宜菽粟稻粱無蔴
麥其理無刑名桎梏之具犯罪者以竹五本束之復犯

者皆其背數止五輕者止三殺人者戮之男女七歲則落髮止寺舍依桑門至二十不悟佛理乃復為居人其衣服悉以白氎與朝霞繞腰而已不衣繒帛云出于蠶為傷生也又獻其國樂凡二十二曲與樂工三十五人來朝樂曲皆演釋氏經論之詞意二十一年四月封彌臣國嗣王樂道勿禮為彌臣國王焉

咸通三年二月遣使貢方物

占卑國

大中六年二月占卑國佛邪葛等六人來朝兼獻象宰
相魏謩以性不安中土請還其使從之

咸通十二年二月復遣使朝貢

雜錄

故事西蕃諸國通唐使處悉置銅魚雄雌相合各十二
隻皆銘其國名第一至十二雄者留在內雌者付本國
如國使正月來者賞第一魚餘月推此閏月賞本月而
但校其雌雄今乃依常禮待之差謬則推案聞奏

開元一十六年十一月五日鴻臚卿舉舊草奏日近緣突騎施背叛蕃國銅魚多有散失望令所司檢校

貞觀二年六月十六日勅諸蕃使人所娶得漢婦女為妾者並不得將還蕃四年三月諸蕃君長詣闕請太宗為天可汗乃下制今後璽書賜西域北荒之君長皆稱皇帝天可汗諸蕃渠帥有死亡者必下詔冊立其後嗣焉統制四夷自此始也二十一年三月十一日以遠夷各貢方物其草木雜物有異于常者詔所司詳錄焉葉

護獻馬乳葡萄一房長二尺子亦稍大其色紫摩伽獻
菩提樹一名皮羅葉似白楊康國獻黃桃大如鵝卵其
色如金亦呼金桃伽國獻鬱金香葉似麥門冬九月花
開如芙蓉其色紫碧香聞數十步華而不實欲種取其
根蜀賓國獻俱物頭花其花丹白相間而香遠聞伽失
畢國獻泥樓鉢羅花葉類朶荷圓缺其花色碧而蕊黃
芳數十步達國獻佛土葉一莖五葉花亦中心正黃而
藥紫色泥婆國獻波稜數紅藍花實似蒺藜火熟之能

益食味又鮮菜狀如菜潤而長味如美鮮苦菜狀如莖
其葉潤味雖少苦久食益人胡芹狀如芹而味香渾提
葱其狀如葱而白辛嗅藥其狀如蘭凌冬而青收乾作
末味如桂椒其根能愈氣疾薛延陀獻凌蘭花毛如牛
角大如麕西蕃突厥獻馬蹄羊其蹄似馬波斯國獻活
解蛇其狀如鼠而色青身長七八尺能入穴取鼠西蕃
吐祿可汗獻金卵雞鵲鳥鵲也雕刻作禽獸而悉塗以
金西蕃諸國出石蜜中國貴之太宗遣使至摩伽佗國

取其法令揚州煎蔗之汁于中厨自造焉色味愈于西域所出者葡萄酒西域有之前世或有貢獻及破高昌收馬乳葡萄實于苑中種之并得其酒法自損益造酒酒成凡有八色芳香酷烈味兼醍醐既頒賜羣臣京中始識其味

天寶二年四月二十五日上因問西蕃諸國遠近鴻臚卿王中嗣上言曰臣謹按西域圖陀拔恩單國在踈勒西南二萬五千里至勃達國一月程西至溟滿國一月

程南至羅刹支國十五日程北至海兩月程羅刹支國
東至都盤國十五日程西至沙蘭國二十日程南至大
食國二十程北至陀拔國十五日程都盤國東至大食
國十五日程西至羅刹支國十五日程南至大食國二
十日程北至渤達國一月程渤達國東至大食國兩月
餘程西北至岐蘭國二十日程南至都盤國一月程北
至大食國一月程河沒國東至南陀拔國十五日程西
北至岐蘭國二十日程從南至沙蘭國一月程北至海

兩月程岐蘭國東南至河沒國二十日程西至大食國
兩月程南至涅滿國二十日程北至海五日程涅滿國
東至陀拔國一月程西至大食國兩月程南至大食國
一月程北至岐蘭國二十日程沙蘭國東至羅刹支國
二十五日程南至大食國二十五日程北至涅滿國二
十五日程石國東至拔汗那國一百里西南至東米國
五百里罽賓國在踈勒西南四千里東至俱蘭佗國七
百里西至大食國一千里南至婆羅門國五百里北至

吐火羅國二百里東米國在安國西北二千里東至碎
葉國五千里西南至石國一千五百里南至拔汗那國
一千五百里文國在蘇勒國西四千里東至俱蜜國一
千里西至大食國二千里南吐火羅國一百里西北至
康國七百里

證聖元年九月五日勅番國使入朝其糧料各配等第
給南天竺北天竺波斯大食等國使宜給六個月糧尸
利佛誓真臘訶陵等國使給五個月林邑國使給三個

月聖歷三年六月六日勅東至高麗國南至真臘國西至波斯土番及堅昆都督府北至契丹突厥靺鞨並為八番以外為繩域其使應給料各依式

開元四年正月九日勅靺鞨新國吐蕃先無里數每遣使給賜宜準七千里以上給付也

大歷十四年七月詔迴紇諸蕃在京師者各服其國之服不得與漢相叅

歸降官位

顯慶三年八月十四日置懷德大將軍正三品歸化將軍從三品以授初復首領仍隸屬諸衛不置員類及俸額

總章元年十一月授婆羅門盧加逸多州酬其丹誠也貞元十二年正月十九日置懷化大將軍正三品每月料錢四十五千文雜料三十五千文歸德將軍從三品料錢四十千文懷化中郎將正四品料錢三十七千文歸德中郎將從四品料錢三十五千文懷化郎將正五

品料錢三十千文歸德郎將從五品料錢三十千文
懷化司階正六品料錢二十五千文歸德司階從六品
料錢二十三千文懷化中侯正七品料錢十八千文歸
德中侯從七品料錢十七千文懷化司戈正八品料錢
十五千文歸司戈從八品料錢十四千文懷化執戟長
上正九品料錢正十一千文歸德執戟長上從九品料
錢十千文勅準六典應收募蕃官前承未置今蕃人向
化近日漸多名位高卑須有等級其增置官品及料錢

等宜依前件其月以歸降吐蕃論乞髯湯沒藏悉諾碑
為歸將軍會昌二年八月制歸義軍使特進檢校工部
尚書兼右金吾衛大將軍同正懷化郡王唱沒斯賜姓
李名思忠冠軍大將軍左衛大將軍同正寧邊郡公歷
支賜姓李名思正冠軍大將軍左衛大將軍同正思化
郡公習聞啜賜姓李名思義冠軍大將軍左衛大將軍
同正寧朔郡公烏羅思賜姓李名思禮守右領軍大將
軍同正寧塞郡公受邪勿可檢校右散騎常侍右領軍

衛大將軍國正充歸義軍副使仍賜姓李名弘順制李
思正弟冠軍大將軍右騎衛大將軍同正昌化郡公李
思義母可封雁門郡君李思禮男可中散大夫檢校殿
中少監仍賜紫金魚袋賜名繼美

天祐元年六月授福建道佛齊國入朝進奉使都蕃長
蒲訶栗寧遠將軍

唐會要卷一百